

光緒重修安徽通志

重修安徽通志卷二百六十

人物志

隱逸一

夫賢人隱見世道升降之端也是故唐設不求聞達之科明置不爲君用之罰一勸一懲而硜硜者終不因勸懲而易其志所謂不事王侯高尙其事者非歟然謂盛世無隱士則中天極盛巢許偕遜潁陽又何以稱焉我

聖朝聲教淪浹巍科顯爵頓天網以羅英俊民之秀者無不觀光而賓廷而一二枯槁之士孤行其志者亦詳於舊籍今所續纂落
落數人而已又按宋陳搏爲亳州真源人今河南歸德府鹿邑
縣地舊志收入潁州與老子誤同茲并削之述人物志隱逸傳

安慶府

周淳于氏戰國時人相傳官爲司空隱居於皖之山後遂名其

山曰司空山

安慶府志

宋向榮咸平閒處士也葬於龍山之麓明萬厯甲申山水衝決

出墓志有云先生皖之熙人也少通經史長而遊於江淮及晚

憩志龍山之下結茅而居朝夕與諸徒講易云云

安慶府志

阮晉卿桐城人鄉舉第一宋亡稱疾不出臨卒屬子孫不得讀

書爲將吏但耕田自給而已

桐城縣志

元黃信一太湖人仁宗時殿試第一工詩文不樂仕進終老於

巖壑閒

江南通志

吳介太湖人甯宗時鄉試第一喜居山谷所止之處多植修竹

異卉清幽絕俗今邑治北門內有井上勒吳解元字痕未滅

安慶府志

府志

明於國華懷甯人博學工詩文不樂仕進專精臨池備有晉唐之法性好山水每遇名勝卽構精舍其間至今招提多以其姓名之

安慶府志

吳宗洙字惟孔懷甯人隱居讀書不問戶外不喜見要人有詣門求見者堅匿不出卒年八十四所著有雙桂堂迎暉閣消夏

塵談諸集

江南通志

胡燦字德晦潛山人性嗜恬淡曾以國子生授安陸州判不赴隱居山中課訓子弟不問生業樂義好施鄉黨誦之

安慶府志

陳鎔字子穀太湖人有志性理之學隱居華林原教授生徒所

著有西溪集

安慶府志

陳桂字秀廷太湖人嗜經史居貧自樂村有婦人爲妖所魘桂至其家妖避之乃語婦曰彼正人幾爲所見後隱於龍山不履

城市

安慶府志

吳讓之字荆野太湖諸生性恬淡杜門讀書不與外事後乃隱居惟日取古人忠孝卓越之事爲人誦說

安慶府志

金蔡字尙美潛山人性至孝卅角時嘗赴闕訴父冤得直家素封蔡盡散以濟人歲饑子憲以衣質米數十斛入門適鄰里告急蔡卽分給之父子饘粥陶然也弟藻姪瑋荷其教授並領鄉薦獨隱居別墅蒔花種竹以詩酒自娛終所著有思補亭集

江

舊通志

安慶府志

按思

補亭集又見文苑金憲傳

曹維周桐城人逸其名少讀書山寺中爲童子師李自成陷京師維周聞之慟哭卽散遣生徒爲寺僧種菜灌畦之暇時取書讀之或曰爾傭工亦知讀乎答曰第識字而已

桐城縣志

新増

吳應鉉字幼玉懷甯人喜讀莊列等書善議論有雅度嘗筮得

蠱之上九決意林泉於松下築謾謾居與釋衲往還尤深於詩

有集數卷今存

安慶府志

顏從喬字若齡懷甯人性恬淡愛豹嶺林泉之勝遂終身焉嘗作隱士詩以自況同時有倪爾嘲方應賓皆嗜古工詩同隱泊塘山中與從喬爲世外交

安慶府志

吳僊字仕富桐城人少卽高隱往往以詩紀事晚年植槐於庭自號綠窗主人有詩云懶向黃花占事業三公畱與後人封迫

四傳而孫果列卿貳

江南通志

方見字惟素桐城人才名冠一時隱於湖山之間與詩人徐宣

相倡和有古名士風

江南通志

方授字子畱桐城人嗜學工詩明亡棄諸生祝髮入四明山中結茅而棲採橡栗而食卒年二十七所著有三奔浙江草漸遊

四集秦川草

江南通志
方氏詩輯

袁平字石綠宿松人性豪爽工詩文高隱西源

江南通志

蔣延祐字孔篤懷甯廩生讀書嗜古凡金石遺文蝌蚪奇字窮

力搜索性孝友撫孤姪如子崇禎末應貢棄不顧隱虎湖以終

安慶

府志

劉若宜字宜之懷甯人崇禎丁丑進士歷官職方郎中京師陷

殺繯爲家人所救遂僧服遜居甌山三十餘年未嘗入城市所

作詩文盡焚其稿卒年八十人稱甌山先生

一統志
江南通志

顏浩字直生懷甯人以舉人官南陵教諭明亡隱居石塘往來

祇山樵野叟而已

安慶府志

方應徵字二治懷甯人少習陰符應武科得雋楊嗣昌檄聘從
軍應徵見事不可爲遂堅辭不出明亡入山但以訓課兒孫爲

事卒年八十

安慶府志

吳道新字湯口桐城人天啟丁卯舉人崇禎間以薦爲國子監助教擢工部主事甲申徒步歸里隱於白雲山營生壩以待死

著書數十卷人稱無齋先生

江南通志
安慶府志

齊述字柳峯桐城庠生按察使之鸞子也之鸞卒於官徒步扶輿歸里後遊太學例授通判覩時艱決志歸隱於免濱以吟詠

自娛所著有柳峯集同邑許雍亦棄諸生著柏菴集十卷

安慶府志

方大晉字中渡桐城人崇禎庚午舉人知建甯縣廉潔慈愛泣

事嚴明盜賊屏息甲申挂冠歸隱詩酒自放所著有歸田錄指

南諸稿人稱文節先生

安慶府志

方文字爾止桐城人司徒大鉉之子也工文詞盡交天下英彥

明亡棄諸生博覽名勝流寓於宣涇之間嘗過涇荒城有詩云

陵陽山下稻花秋南陌東阡自一邱聞道沈沙多折戟居人知是古猷州微辭感慨涇人能傳道之早卒所著有龔山集

涇川詩話

府志

安慶

孫中岳字又申桐城人父臨死節後流寓閩嶠十餘歲始聞道歸息影埋形悲愉憂戚一寓之於詩

安慶府志

周岐字農父桐城人少孤事嫡母以孝聞崇禎中貢入京師屢上書言時政得失以薦參少司馬孫晉軍事授監紀推官史可法開閩維揚岐贊畫軍務尋謝病歸築土室嘯咏以終著有孝經外傳執宜集燼餘稿行世子煊明經不仕著有秋懷詩角居

集

一統志 江南通志 安慶府志

姚康桐城人明季流寓懷遠與楊尙渾友善楊築繪景樓延四方豪雋之士康主其家每出遊山花壓鬢村醪流巾歌哭無端

聞者哀之

懷遠縣志 舊志刪
陽府流寓 新修

阮魯士字一儒太湖諸生博極羣書尤工書法甲申後隱居羊

陽山閉門卻掃著述自娛爲人長厚有古風鄰里化之

安慶府志

楊逢泰字開甫宿松人明季寇亂厭薄功名以詩自娛晚遂閉

門究心墳典著有居此居集

安慶府志

吳莊宿松廩生博雅多才明季入山築藕花居以詩酒自放不

復過城市

安慶府志

孫震字魯山桐城人由進士累官兵部尙書明末避地仙居二

都方宅後復移寓一都安甯有烟霞皆物外雞犬卽仙家之句

浙江通志
新增

周孔修字敬之望江諸生童年遭父母之喪耕踊如成人明季

寇馬縱橫望江孤城凡築壘犒軍一切備禦孔修皆力任其事

甲申後裹藥杜門屏絕世事鬱鬱以終人咸悲其志焉

安陸府志

李在銓字當衡桐城人喜讀書朱黃錯雜警校精嚴流寇躡桐爲有司籌戰守方略登陣告誠城賴以全甲申後棄諸生斗室

蕭然以吟咏書畫自娛

安陸府志

王翰號廢夫宿松諸生晚逃於禪不求仕進工詩善飲朱彝尊嘗採其詩入明詩綜至今宿松言高士必首推之同邑張光裕亦工詩不求聞達所著野望詩明詩綜采之其高曠不減王無功也

宿松縣志

王繼統字伯祥桐城人明亡棄諸生扁舟草服放情山水著有

蕪湖集

桐城縣志

夏承春字廣生桐城諸生博通經史多藏宋元名跡及古彝鼎皆能辨其真贋甲申後不與世事簪冠野服隱龍眠山所著有

晞髮集

安慶府志

胡吳祚字樸學桐城人明季寇亂避地池陽又寓金陵明亡棄諸生歸隱西環山中四十年不入城市所著有駢雅百六十卷

子彌彈博聞強識克紹其學所著有石門集

安慶府志

劉餘芳字芳遠潛山人爲諸生二十年未嘗一謁當事甲申後隱皖山著四書性理大全纂以琴書花竹自娛名流咸推重之

安慶府志

汪延運字徙之潛山人嗜古好學尤工書法後棄諸生築山房

讀書課子以自終焉

安慶府志

周期應字維新太湖庠生甲申後耽情麴蘖放懷山水所著有

酣齋歌及諸文稿

太湖縣志

汪之順字禹行懷甯人乙酉後棄諸生隱於梅湖著有詩刪周

亮工爲序而行之

懷甯縣志

范又蠡字小范懷甯人乙酉後棄諸生遠遊數年晚隱漳湖不

入城市著有釣吟集

懷甯縣志

姚亮字揆采桐城人乙酉後棄家以遠遊著述爲事有讀史辨疑易存井田圖說及絳雪堂詩集子秉潛亦工詩善駢體文清

操如其父

桐城縣志

張度字齡若桐城人性至孝潛於名利親歿遂棄舉子業專攻詩古文書法文待詔畫倣黃子久詩品在丁卯劍南之間所著

有蟋蟀窩集十卷

安慶府志

陳昉字朗生桐城人嗜酒負奇氣鑿石構軒顏之曰石舫寇至方飲持杯大罵爲所砍未死後有二賊至識之曰陳先生也爲合其頸傅以汗污氈毛灰遂漸愈晚年以酒瓶挂樹就而飲醉

則拾敗葉破瓷書所得句於上後更架小樓於石舫之巔不下

樓者數年

桐城縣志

韓長世懷甯貢生明季避地金陵歸隱於黃荻阪著有竹堂詩

集

懷甯縣志

韓鼎應懷甯人乙酉後棄諸生構數椽於湖山閒顏之曰醉陶

賦詩飲酒而終

懷甯縣志

朱延祚桐城諸生嗜酒工詩善草書後乃遜跡深山與禪和野

叟相唱和著有果園藁十餘卷方詹事拱乾爲序而行之

桐城縣志

阮潛字季子懷甯人築室龍山冬夏惟披一衲工詩畫得酒卽

揮灑自如嘗謂友人曰死卽葬我草堂之側題石曰此飲者阮

子一衲之墓

江南舊通志

周自新字澡一望江人初爲掾吏安廬道史可法與語奇之畱

參幕府時黃梅賊掠潛太閬可法用自新計急攻之遂破賊於
天堂居三載以母老辭歸可法屢招之並薦於朝皆不應隱居
林下以終可法殉節揚州自新悼慟招魂祭奠焉

望江縣志
新增

任之燦字燉伯懷甯諸生明季僑居金陵當福藩監國時奉母
歸聞左良玉兵叛陳防江守城分兵措餉諸策時不能用乙酉
城潰閒道入山及

大兵平江南傳檄至皖之燦泣曰滄桑之變不意吾身親見之肅
衣冠北向拜畢端坐而逝祀鄉賢

懷甯縣志
新增

國朝張載字子容桐城諸生大學士英之兄性孝友博學能文多
材技明季桐遭流寇父贈君遇賊不知所在載縋城透賊營徧
求之山澤力護以歸與諸紳分陴守禦射賊無不洞胸遂引去
後年未四十隱於松山不入城市三十年親故罕見其面年七

十餘著地輿圖尺幅中作小楷數千精妙絕倫卒年八十一

一統志

江南通志
安慶府志

方孔時字叔茂桐城庠生嘗作治平策十四事左光斗爲上之朝高攀龍黃尊素皆謂切中時弊疏畱中補國子生陸萬齡請以魏瑤配孔子司業朱之後上其疏孔時太息卽日南歸畱書與之俊直言切責坐黜爲民崇禎初晉恩貢生除台州府同知不赴舉賢良方正亦不就

國初江督馬國柱皖撫李曰梵疏薦堅辭不出卒年八十五門人

私謚介節先生

桐城縣志
以上舊志

王化字高山桐城人積學窮經隱居研易以終其身所著安玩新書內外兩編據元會運世之說而衍之由象數而推見大原

晚更名嵩自號遜齋又曰天山人

方宗誠柏堂文集
桐城縣志
以下新修

盧宗祿潛山諸生寓湖北竹溪縣嘉慶初教匪竄竹溪宗祿以計走之時額勒登保追剿至竹溪訪知奇其才屢招不赴嘯咏終身著有繡谷詩鈔

潛山縣志

鄧石如以字行後乃更字完白工隸書精篆刻嘗一筇一笠肩行李走百里自號笈遊道人登匡廬入黃嶽上春山見漢唐古碑必手摹之初藝不及中人偶至涇趙侍御青藜子之書使至白門詣宣州梅鏐館其家半干閑一年梅藏漢舊搨數十種石如日取而臨摹之足不下樓者數月一出遂以書名天下

懷南縣志

技舊志方新移

徽州府

唐張友正歙縣人結廬城陽山下貞元末魏宏簡來為宣徽副使重其才請為披雲亭記立成酬以金帛不顧去

唐文粹江南通志

宋邱濬字道源黟縣人天聖五年進士因讀易悟損益二卦能通數知未來早歲游華陽洞求爲句容令歷官至殿中丞嘗語家人曰吾壽終九九後至池州一日起盟沐索筆爲春草詩端坐而逝著有詩文集十七卷

徽州府志

曹汝弼字夢得休甯人高蹈不仕與林逋魏野齊名號松蘿山人

江南通志

汪潭字六才績溪人隱居不仕號水月居士蘇軾嘗贈之以詩

東坡全集

胡如愚字不愚婺源人從胡安定學爲一邑儀表卒門人私謚

曰德隱先生

徽州府志

洪搏字節夫婺源人讀書根究理道元符初詔徵不就築室主龍山園授徒講學朱子方弱冠搏知其賢與爲忘年之交著有

菊坡言志錄

徽州府志

許潤字子瑩績溪人政和中累徵不起構樂山書院於沈山講

道其中

徽州府志

俞靖字朱祐婺源人與朱松爲星溪十友

徽州府志

程鼎字復亨婺源人從朱松學於閩卒後朱子表其墓

江南通志

胡正歛縣人仕至兵部尙書靖康中避亂常山縣卒葬郭山其

所居今名胡村

浙江通志新寧

程先字傳之休甯人痛父死節於金守墓不仕嘗問道於朱子

著有東隱集

江南通志徽州府志

邵悅字貞父休甯人隱蘿山精舍玩易象集方書施藥活人兩

膺辟舉皆不就

江南通志

張雄飛字宏甫歙縣人嘉熙中鄉貢絕意應舉教授子弟作家

訓謂立身自名節始名節自孝悌始卒之日遺命勿用浮屠門

人私謚曰明善先生

徽州府志

李縉字參仲婺源人絕意科舉築室鍾山朱子嘗與程珣過縉

講論極稱其文卒表其墓著有論語西銘解諸書子季札亦從

朱子學有問答見朱子語錄著有近思續錄字訓續編諸書

江南

通志 徽州府志

汪大發字敷之休甯人淳祐閒魏了翁築室白鶴山下大發負

笈從之得其傳歸建平山書院教授於鄉學者稱爲騰波先生

江南通志

江愷字伯成婺源人潛隱耽著述時婺貢楮絲民甚病之愷以

書白部使者貢得蠲程旬軒嘗稱之曰欲知隱不爲徒隱須看

當時免貢書

江南通志

金彥超休甯人理宗時教授懷甯愛舒州山水之勝遂卜築潛

之西山讀書味道構黃山別業家焉

安慶府志
慶府流寓

舊志安
新移

范啟字彌發休甯人理宗時三徵不起賜號風月處士著有雞

肋漫錄管錐雜志并觀記諸書

江南
通志

潘洋發字巖肖歙縣人淳祐中爲太學生上書論史嵩之起復
之非不報退隱潛虬山累徵不就常輯龍溪紫陽諸文撰文海

天琛

江南
通志

徐驥字伯驥婺源人學於胡宏著義易圖皇極經世發微

江南
通志

方秋宇歙縣人隱居黃山吟咏樂志著有秋宇吟藁韻府等書

鄉人祀之於六逸祠

徽州
府志

趙幾字成德休甯人隱居徜徉以詩文自娛著有史權及吟嘯
集姪彌忠字資敬廉使察其行舉爲校官高蹈不仕著有雲屋

集

江南舊志 徽州府志 宋詩紀事

李偉字敬叔祁門人咸淳中任郡學賓師入元不仕嘗作經史

訓注二圖

江南通志

劉光字元輝歙縣人開門授徒五十餘年元行省差充甯國路

學正不赴

江南通志

羅榮祖字仁甫歙縣人與處士蕭軒同被徵鄖左參力爲勸駕

榮祖嘗招隱詩謝之

江南通志

金若洙字子方休甯人受書程若庸之門弱冠領鄉薦令黔江

朱亡不仕隱居東園著述以老

江南通志

許宗堯字子仁績溪人隱大鄣山累徵不就

江南通志

吳應紫休甯人年十六領鄉薦朱亡不仕有詩云自甘白屋爲

閒叟敢說青雲有故人

徽州府志

汪宗臣字公輔婺源人咸淳中兩中選宋亡不仕與弟季洲同居子姓四百餘指和氣雍雍著有世乘窺班及紫巖集年九十

二逮見五世

新安文獻志

胡次焱字濟鼎婺源人咸淳四年進士授湖口主簿改貴池尉有鬼物慙毆死者爲白其冤元兵至境總制以城降微服脫歸或勸其仕作媒嫠問答詩以見志著有四書注諸書人稱梅巖

先生

新安文獻志
宋詩紀事

孫嵩字元京休甯人以薦入太學宋亡歸隱自號艮山以示意時許月卿堦江愷及汪炎昶皆絕意當世俱從嵩遊其詩悲壯激烈讀之可知其人弟巖字次皋亦不仕著有爽山集

新安文獻志

宋詩紀事

吳欽字敬遠休甯人中漕舉宋亡題於屏曰殷周雖代而首陽

自存晉宋雖更而陶徑自若有樓名延桂人稱延桂先生

徽州府志

滕堞字仲塞婺源人宋亡不仕常命其兄子舜父求得文天祥

過金陵驛詩懸於堂焚香拜泣又過西湖拜岳墓有相對含悲

石翁仲老衰無淚落秋風之句著有星巖詩

新安文獻志 宋史紀事

元汪萊甫字芳卿歙縣人好讀易自號草窗先生虞集薦之詔

有司辟舉不赴

江南通志

吳浩字義夫休甯人隱居不仕專務性理之學所著有直軒集

大學口義諸書明永樂間纂輯大全多採錄焉

徽州府志

汪興祖字汝舟祁門人元季不仕僞漢隱居教授又汪從政字

龍泉至正中兵科給事中明初除中書舍人不就年八十五

汪氏

通譜

祁門縣志 新增

朱宦字良卿休甯人讀書不樂仕進至正二年特劄賜號澄節

處士弟永錫亦博學與宦齊名徽州府志

黃德清字古田祁門人從戎滁州元鼎革遂隱居不出著有農

桑備考

祁門新志 新安名族志 新增

明羅城輔字誠一歙縣人太祖駐師玉屏山以耆老召見對稱

旨欲官之不受

江南通志

胡安字伯康歙縣人郡守陳彥回以懷才抱德薦不就同邑王

寅字仲房少爲諸生棄去遠遊喜談兵工詩習禪自號十岳山

人

江南通志

吳買字漢臣休甯人通五經尤精易洪武初屢徵不就同府舒

遜績溪人工詩亦辟舉不就又湯守敬字彥肅婺源人明初詔

舉名儒不就

江南通志

王善慶歙縣人力學善書居璫溪結屋僅容膝屢召不出同邑

鮑甯字廷謚正統閒御史郡守交薦不出著有天源發微辨江

通志

金顯德字世榮休甯人博極羣書不求聞達出粟賑饑聞於朝

欲官之不受門人私謚爲節孝先生

江南通志

唐世靖字介福歙縣人一日讀書見先生云四股入比之外原

有學問公卿大夫之外原有人物遂棄諸生爲山人布衣葛巾

吟詩染翰所著有三邱山人什一草

江南通志

方問孝字胥成歙縣人別名癯丈人亢直不肯阿世隱居不仕

著有蒼耳齋詩三十卷

江南通志

吳拭字去塵休甯人性豪縱有潔癖嘗持千金一日都盡善詩

工書畫製墨及漆器精妙人爭寶之又精琴理有訂正秋鴻譜

嘗自入山擇琴材故相傳有去塵琴云

江南通志

汪益亨字德裕歙縣人與江天一等相友善諸人既各成其志益亨南走閩越歸老秣陵號鍾山逋客著有鷺飛魚躍集及南

華注諸書

徽州府志

汪佑字啟我歙縣人明季與楊廷樞等講學蘇州後乃絕意仕進講學於紫陽還古兩書院幾三十年一鄉化之

徽州府志

王泰徵字嘉生歙縣人崇禎丁丑進士歷吳川新會建陽令俱有聲擢禮部主事未赴值明亡歸隱檀山杜門教授著有樗菴集及春秋四傳輯言周禮考工辨五代史歎友林漫言諸書

徽州府志

府志

汪沐日字扶光歙縣人崇禎癸酉舉人後入吳爲僧名正濟號益然晚以故人迎歸黃山自知死日集故友爲詩而逝著有易解莊通諸書同邑羅斗明亡不仕著有翁山集又有程自玉者

隱於醫四十餘年不踐郭門

徽州府志

章佐聖字右臣祁門人棄諸生賣卜於市著有麟經志在解大易時義注同邑陳二典字書始亦棄帖括杜門著書以程朱爲的又汪文錫亦棄諸生杜門不出又歛程守汪溥皆棄諸生著書終老程有省靜堂集汪嘗刳股救親有丹石齋史論沈史越吟諸書

徽州府志

方允煥字其章歙縣人明亡不與試不娶妻僑居淮上有湯隱君者樓居三十年禮絕送迎惟允煥至寒裳就焉

徽州府志

程錫類字不置休甯人明亡棄諸生一意纂述凡經史詞曲百

家手鈔成帙嘗舉生平所見聞之書爲書目一百二十四卷曰

見聞傳聞錄

徽州府志

查潛字淵若婺源人爲文高古足跡不履都聚迹高湖山道

其廬者不得見尤好周恆破產濟人至極貧不怨

江南通志

王環號石農休甯人從金聲遊以古文爲制藝明亡絕意仕進

遊覽四方足跡幾徧海內所著有高雪堂集詩嶽初集

徽州府志

汪荀字淑子休甯諸生善古文明亡棄去爲詩歌以自娛著有

霜崖集鴻雪居詩餘自怡編

徽州府志

謝喆祁門人幼孤力學明亡不就試冠婚喪祭皆據三禮率宗

族力行有欲薦之者以母老謝力辭不就

祁門縣志

謝天達祁門人明亡以隱逸終潛心理學以程朱爲的從祀紫

陽書院及本縣朱子祠

祁門縣志新増

陳汝器陳昭祥陳元祥陳起辛並祁門人讀書隱居不求聞達

昭祥著有穎西社集天遊稿元祥著有花月樓陽春亭長嘯臺

等稿

祁門縣志新増

孫國瑜字玉汝休甯人明亡隱居不仕以布衣終高風亮節見
重時流又吳炳孫漢昭方里並休甯布衣教學著書不求聞達
方里著有一枝山房集四聲音釋義

休甯縣志
新增

劉士宏字毅人徽州人少有至性刲股療親疾曾至西粵以策
干當事招諭獠犛有功以通判用不樂仕進去爲汧漫游僑寓
繁昌城南著作盈笥一時名流杜萊村陳伯璣等皆爲之傾倒

太平府志
太平府流寓
舊志太
新移

程昌誼字越未婺源人爲文直追秦漢性孝友居喪一遵古禮
明末見時艱卽棄諸生築室西山之麓日課子姪以性理之學
所著有性理宗要霞思草易解未成堂集諸書

徽州府志

汪偉字位三黟縣人崇禎中恩貢築室深山偕兄弟四人窮經
不倦每月朔望謁先師率子弟講孝經歌詩習禮著有聽石吟

廣孝篇天潛講義大易解諸書

徽州府志

楊泗祥字瑞呈休甯人父卒未葬土寇猝至泗祥守柩不去賊

知其孝子戒勿犯還古書院久廢力請當事復之又復興石橋

巖湛若水講學書院并草創紫陽六邑大會敦崇正會講學不

倦及卒同人祀之會所

徽州府志

余紹祉字子疇婺源人年十二封股療母善古文工行草築室

著書自號疑菴居士著有詩草賦草山居瑣談元邱素話訪道

日錄子藩卿字翰臣明亡棄諸生寄情溪山三十年以詩歌古

文詞見志著有家居四禮天經堂文集頑石居詩集

江南舊志

汪蛟字辰初歙縣人崇禎己卯舉人李自成陷京師走閩粵滇

緬閒二十餘載藩帥聞其名薦之以原職用蛟以母老固辭母

卒杜門謝客著有客滇集詩古文詞數十種兄季舒舉人亦以

文名

徽州府志

王元度歙縣人明季棄諸生皈依禪門絕葷酒著有軒轅閣詩

集同邑洪舫字方舟豪邁不羈室中常奉屈原杜甫木主禮拜

之著有離騷辨杜律評諸書

歙縣志
徽州府志

凌世韶歙縣人進士歷官戶部郎中甲申後棄家至白門爲僧

於萬松菴

歙縣志

周士暹字鏡玉績溪人明末拔貢甲申後隱於岐黃有勸之出

者作貞女答問詞以見志著有春秋鍵鑰墨莊集

績溪縣志

曹鳴遠字文季婺源人進士知臨川縣有破賊功明亡改號寄

菴遜跡林泉有所感一以詩文見志人擬之靖節云

婺源縣志

汪洪道黟縣人明季常參左良玉軍幕及左夢庚兵變遜歸土

寇黃之貞及黃嶺賊賸桂子等攻破邑城洪道率鄉兵逐之殺

賊數百人賊遞去亂定爲僧棲止石鼓寺

黟縣志

汪端聞休甯庠生工詩古文築小齋於城之東藏書萬卷以詩

酒自娛著有非非集行世

休甯縣志

王春光婺源人本名斌衡甲申後棄諸生改名焉隱居授徒以

詩寫志詩法陶淵明其澹遠處幾於神似著有排青閣集

婺源縣志

吳雲字望如婺源人甲申後棄諸生躬耕樵采以自給嘗識詹

養沈於寒微後詹解組歸遂絕跡不與往還

婺源縣志

國朝黃生字扶孟歙縣庠生棄舉子業一意著述著有字詒義府

收入四庫又有杜詩說十卷

江南通志徽州府志

吳大先字維則歙縣人家貧著述言行不苟時攜琴書山水間

繙繹之暇輒彈一闕自娛所著有離騷致幽集左傳史記莊子

別解諸書

江南通志徽州府志

汪宏淦字澄一歙縣人年二十七始讀書崇禎己卯領鄉薦攜妻子隱居繁昌假魏氏園以居徧歷馬仁隱玉諸山嘯吟不輟有達官貴介委曲招致皆不顧著有涉江草伴愁吟懶餘山居襍興等集

太平府志
平府流寓

舊志太
新移

方兆曾字沂夢徽州人僑居蕪湖讀書不應試工詩古文辭蕭雲從湯燕生皆極重之著有省齋詩稿

太平府志
平府流寓

舊志太
新移

查士標字二瞻休甯人書法精妙人謂米襄陽董元宰再出畫尤爲絕技出入雲林子久之間求書畫者車馬填門至有寓其家半載而不得者與太倉三王齊名年八十餘卒

徽州府志
畫徵錄

以

上舊
志

曹應鍾字耳山歙縣監生博通經史善古文詩賦尤精篆書咸豐元年舉孝廉方正不就放懷山水著詩文稿數十卷未刊

志以
下新修

鮑邦倫字時憲歙縣人豁達通經史善鍼砭術自號樂靜老人著樂靜詩文藁十三種同里胡大溟字鶴田工詩隱於醫謂岐黃精蘊非研究河洛不明著易醫格物編四卷

歙縣志

余畝松婺源人讀書能文工篆隸精琴律隱居灌園採藥自給或餽錢帛輒不受

婺源縣志

余佐字忠元黟縣人精易學隱於卜筮吟詩作畫著冬青居士詩二卷

黟縣志

鮑桂孫字古香黟縣人祖元俱父寬皆以詩名桂孫善篆隸八分尤入妙著有石鼓文考仿漢印譜家無顧石而真樂不改或勸之從事願者掉頭不應以石隱終

黟縣志

甯國府

晉瞿礪先生不知姓氏太和末隱宣城文脊山山有瞿礪石因以爲稱桓溫造焉先生披鹿裘坐石室神色無忤溫及僚佐數十人皆莫測乃命伏滔爲之銘贊竟卒於山中

晉書本傳

劉遺民逸其名釣隱於涇縣白雲潭上今涇有遺民釣臺

涇縣志

按甯國府志涇舊志皆言遺民爲柴桑令與陶淵明等結廬山白蓮社疑爲附會然今涇白雲故址土人皆能指之或別有其人存以俟考

唐萬巨涇縣人天寶閒以材薦不就李白有贈扶風豪士歌以

巨遠祖漢槐里侯萬修封扶風故以爲名

李太白集甯國府志

汪倫涇縣人隱居桃花潭側李白遊涇倫款之白贈詩有桃花潭水深千尺不及汪倫送我情之句又有過汪氏別業詩極稱

其好客之賢

李太白集涇縣志

元逸士宣城人有志操杜牧許渾並贈以詩皮日休嘗遺之書云足下行奇操峻退臥陵陽錫命累頒高風轉固見文藪惜逸

其名

江南通志

王善可旌德人不樂仕進吟咏風月晚歲益篤嘗遇異人自知死日及期吟詩而逝又有方壺者甯國人其先自旌德徙隱居

於陶瓦嶺子孫皆稱五嶺方氏

甯國府志

宋張貴字待舉宣城人慶歷癸未進士以臚唱失儀免遂隱居不仕黃庭堅贈以詩云人賢忘巷陋景勝失途窮王安石居金陵貴與之同登第放舟訪之經宿而還安石畱之不可曰吾興

闌矣其高致如此

甯國府志

劉逸太平人高尙不仕孫覺爲邑令甚重之

甯國府志

呂仲法旌德人性恬退政和間屢辟不就築室東山吟咏自適

甯國府志

程炎子涇縣人隱琴高山文天祥曾過訪之名其樓曰森翠所

著有煙水集

宋詩紀事江南通志

徐時涇縣人隱居碧山石門五十年躬耕自給刻詩於壁自道

其樂當時高之

甯國府志

吳晦之字元用甯國人客游江淮周覽名勝晚隱道山築生香

亭一室幽棲著嚼蠟集

江南通志

王謙宣州人建炎閒避兵徙建平高蹈不仕子浩亦有隱德浩

子機官修武郎繼娶濮安王第四女永壽縣主嘉定八年歲饑

部使者眞德秀貽帖易粟機慨應之饑民全活甚眾

一統志舊志廣德

州流寓

新移

元貢性之字友初宣城人師泰從子也以國子生補閩省理官

明初改名悅避居會稽耕漁自給邑人芮麟遇之邀與俱歸辭以詩曰游絲落絮俱成恨社燕秋鴻各自飛杜宇叫殘孤館夢西風吹老故山薇每有所感泣然泣下卒門人私謚曰貞晦先

生

江南通志

梅致和字彥遠宣城人隱居城南屢辟不起著有春秋類編十

二卷宋學士濂爲誌其墓

江南通志

宗德涇縣人隱居水西世祖聞其名命樞密張易徵之不起後

又徵爲侍中不拜卒年九十二

南國府志

陳玉峯太平人以尙書春秋名家登第後僅一試爲令慨然曰

陶彭澤何如人乃爲五斗折腰遂歸隱黃山不再出

徽州府志舊志徵

州府漢寓

新移

左德道涇縣人性恬退以吟咏自娛與其兄震道皆爲劉基所

重勸之仕不應著有陋巷集

甯國府志

左斷炎字榮叔涇縣人治易禮喜吟咏愛山水之勝攜琴鶴自

娛知死日端坐而逝

萬姓統譜

程應鼎旌德人至治辛酉鄉薦隱居不就辟舉築室東郊取杜

詩知予嬾是真之句顏曰是真著有論語發明

甯國府志

明林景初太平人洪武初求遺賢知縣梁德遠勸之仕以疾辭

隱居香山號獨隱居士同邑王燧生於元末遭時亂隱居養親

洪武初遊太學不願就職以親老辭歸讀書自娛徜徉終身

江甯

通志甯國府志

貢鏞字元聲宣城人博洽工詩家人夜執盜鏞不欲識其人命

勿燭盜曰苦多逋負更給布粟遣之里人患疫眾膜視自持藥

療之錄古隱士有跡無名者以自況著有西園遺訓西園集

江甯

通志 甯國府志

劉章甫南陵人性恬淡不樂仕進喜吟咏士大夫慕重之其孫

允迪善書法永樂初以楷書徵不就自號中山書隱

甯國府志

楊貞字彥恆宣城人少孤篤學不干仕進莊梟聞其名訪之卽

田閒訂交而去後同邑施閏章爲作傳弟實亦能詩

施愚山集甯國府志

志

王源字惟遠南陵人幼抱遠志慕陳獻章莊梟之爲人力學不

輟著有東溪詩集同邑范如岡字楚夫宏治壬子舉人絕意仕

進杜門講誦著有知新錄歲寒亭稿

甯國府志

袁鶴聲宣城人好古文辭長於詩不樂仕進遂棄諸生以吟咏

自適著有鷄居集同邑陳于賓潛心經史不應有司試湯賓尹

爲題其居曰竹隱窩著有四書鐸五經鐸廿一史撥竹隱清言

文粹等書又有陳廷梓者天性恬淡亦有古隱者風

甯國府志

王廷考字思道涇縣人少補諸生旋棄去不應試與羅汝芳查

鐸等講明理學著有孤山集

甯國府志

江溥字紀源旌德舉人見時事多不合遂決意不仕築松筠居

以隱蕭然獨樂

旌德縣志

張一鑑字冰鑑涇縣人萬歷丁酉舉人不樂仕進喜遊名山每

遊必記築小隱園於城南自作阿麼居士傳

甯國府志

湯廷對字士初宣城明經好讀書足不踰戶限善春秋不肯謁

選同時有汪千頃亦明經不仕

甯國府志

洪載號野鶴涇縣人隱居嗜古爲詩效陶靖節孟襄陽歲饑周

恤鄉黨有鬻兒女者爲贖還之著有雲水集

江南通志

方海號東郊樗叟南陵人不以利祿經心惟力行孝弟鄉人化

之遂成善俗人稱爲隱君子

甯國府志

洪善應旌德人幼習舉子業棄去結廬山中終身不入城市同
邑江有衢號龍山居士讀書恥秦漢以下結廬龍山吟嘯自娛
著有檢身家訓

甯國府志

湯燕生字巖夫太平人甲申後棄諸生寓居蕪湖築補過齋自
號黃山樵者博覽羣書善詩文工書畫尤篤於義故友有難幾
以身殉晚尤用心於易年七十餘卒

甯國府志

黃可縉字元獻甯國人崇禎時舉人守道重義隱約自甘值明
季不復仕進兵荒汴至出資以濟鄉里並勸邑人相周

甯國府志

胡簡文甯國人甲申後棄諸生入山佯狂日咄咄作書空狀著

有歷代忠臣錄水村集

甯國府志

洪維翰字叔宗涇縣人崇禎癸未進士督餉浙中明亡流寓閩

越久之歸築室舉山終其身爲詩排蕩離奇激昂慷慨而性獨

和易近人能周緩急卒之日鄰里皆巷哭

甯國府志

包應暘字旭之涇縣人甲申後日縛一草偶書李自成姓名牽

出郊外射之人以爲狂旣乃結草廬香爐峯飲水茹蔬窮餓以

死族兄玉琦亦窮餓終老人稱難兄難弟

甯國府志

王雲鵬涇縣人甲申後棄諸生自髡爲僧著有五經詳說同邑

汪裕昆亦棄諸生築一室坐臥其中終身不出戶又有查志成

者性孝友善做米海岳書立家規建公祠勸捐義田數百畝一

族賴之甲申後棄諸生晦跡深山自署其號曰明志

甯國府志

胡蜚英字淡然涇縣人與諸儒切磋砥正學甲申後計年例當貢

避不就閉戶潛修闢發經義著有初言中言子大甲諸生行己

端方克承父志

甯國府志

鄭過字原古涇縣人甲申後棄諸生寄情詩酒終其身著有樗齋集同邑翟尙志字伯海亦棄諸生種菊陶山與萬應隆等唱

和

甯國府志

楊遜字懷鳳甯國人好濂洛考亭諸書立品孤介不屑仕進嘗居晉蔭寺集同人講論一時景從

甯國府志

吳偉儒字聖開甯國人喜講學見有雜以禪者則斥焉居父喪哀戚瘠毀甲申後棄諸生負母隱於梅溪

甯國府志

陳輔性字足彝太平人嚴毅孤峻榮辱禍福不以動心喜爲詩獨嗜杜陵以其惓惓不忘君國也甲申後棄諸生遯迹黃山以

老

甯國府志

朱鶴祚字士賓太平歲貢嘗讀書不下樓者三年爲文原本經術崇禎末時事日非遂閉戶不出研精理學尤邃於易卒年八

十餘富國府志

焦守文字肖甫太平人不圖進取喜吟咏工書法以琴書花石自娛著有歷代年譜及家乘同邑崔海性孝友峻潔絕俗託跡泉石惟恐人知富國府志

孫烈字承哉宣城人崇禎間增廣生入南雍文名藉甚明亡絕意進取怡情泉石終其身富國府志

李一堂字伯升太平人甲申後棄諸生削髮入匡廬後有族人見之五老峯下熟視佯不識徑入山去同邑項士文亦棄諸生徜徉山水以終富國府志

國朝徐惇宣城人嘗以薦議授四川幕職旋棄去爲僧名在柯號半山善畫山水氣韻天成桐城方氏贈以詩云一著袈裟絕萬緣只餘破硯習難捐江山本是無情物寫出荒殘極可憐畫後錄

方氏詩載
甯國府志

倪正字方公宣城人父元浪著釣譜一書極博奧正古文高邁

書法蒼勁尤精天文歷算富事敦請皆謝弗應梅文鼎嘗從受

交食法

甯國府志

徐煌字子盛宣城人年十二補諸生長輒棄去好爲詩吟咏無
虛日家無甌石不輕受餽遺同邑楊組字又棊爲諸生有聲已
而謝去善詩詞工書法喜斲老樹根爲人物鳥獸摩挲不去手

甯國府志

駱上翊字贊若宣城人性至孝父士襄臥病積年早夜侍牀蓐
不懈父卒絕意進取枕藉書史尤工寫山水一時推重之

甯國府志

曹希冕字文斗涇縣人少慕嚴子陵龐德公之爲人構精舍於

小嶺之陽著淨土詩四十八首

甯國府志

王學基字禹疇南陵人善古文詞落拓不羈野貌古心隱居尚

志并日而食百結不完泊如也

甯國府志

翟斗字對松涇縣人隱居桃花潭工吟咏有對松閣詩集同邑

包眉齡好遊山足跡半天下每作詩歌以紀其勝老而隱於烏

龍山有詩集四卷

甯國府志

張邦極字斗樞甯國人嗜學工書不求仕進隱潯潭嘗攜酒吹

簫徜徉靈峯桃源間以終

甯國府志

無名子太平人嘗持一封交邑歲貢胡紹虞家時紹虞外出及

歸發之有白金數十兩書一函云平生苦積所餘浼其置田附

胡氏於箬嶺施茶不願畱名紹虞爲勒碑誌之曰無名子云

甯國府志

府志 以上舊志

周啟楹字殖庭甯國歲貢七歲執父喪哀毀如成人弱冠爲邑

經師家小桃源有鳳岡林壑之勝構草堂藏書數千卷講學其中選教諭不就飲酒賦詩蕭然物外三十年不入城市

甯國縣志新修

重修安徽通志卷二百六十一

人物志

隱逸二

池州府

唐高霽字暄之秋浦人隱居石門山桃花陂李白嘗遊其地又

嘗與霽同憩於青陽夏侯迴之堂相與聯句

一統志

池州府志

王繩秋浦人大歷間與河東耿漳善漳有雪後宿王繩池州草

堂詩蓋池之隱君子也

池州府志

鞏疇字禹錫秋浦人宣歙池觀察使鄭薰重其能以車幣致之

爲薰說易老子姪瑁聽後薰休居於洛疇往訪之薰贈以詩今

白笥坡有疇祠

池州府志

李昭象字化文池州刺史方元之子也方元罷池州卒於宣城

其家遂畱秋浦懿宗末昭象至長安路巖見其能深器重之後
避黃巢亂入九華築室碧雲峯下與張喬顧雲杜荀鶴爲方外
交楊行密聘之不起

唐詩紀事
江南通志

南唐陶守立貴池人通經史善屬文保大中樓隱齊山以詩自
娛兼工畫佛道鬼神山川人物後主金山水閣有十二羅漢象
守立所繪

十國希
秋本傳

夏鴻貴池人嘗與兄鵬輯十三代史略隱居不出鄉人罕見其
面子乾錫樊師古嘗師事之及守池薦於朝宋祖以冠服召之
竟不起自號清溪布衣時推一門高尚

江南
通志

宋劉放字世疏青陽人隱居九華之雙峯下自題石壁曰清隱
巖著九華拾遺一卷

江南
通志

陳翥銅陵人閉戶著書雖家人非其時不見

江南
通志

李國平建德人善詩不樂仕進隱居觀音院

池州府志

程太古青陽人紹定閒隱居九華合刻僧應物滕子京九華新

舊二錄爲總錄

池州府志

陳巖字清隱青陽人博極羣書負用世之志宋亡遂深自晦匿

築室高陽河以居出則徧歷九華之勝有九華詩集

宋詩紀事

元清谷居士不知何許人元初隱居於石埭縣七里之南山有

唐蟄者字起之貴池人與居士相唱和當路幣聘不應鄉國稱

之曰茶川逸民

池州府志

郎禮卿貴池人至順閒舉人不樂仕進築煥園於城外杏花村

居之

池州府志

楊仲愚青陽人幼好學博通經史隱居不仕所著書甚多

池州府志

明徐宗禮銅陵人有行誼善詩文不樂仕進以與黃觀友善編

成奉儀衛後赦還

銅陵縣志

洪仲遵名道以字行建德人通易春秋屢辭辟命後授本縣訓導復以老辭與江容等遊號五老

江南通志

吳世閔字子功青陽人工詩古文一生無情容倨色後棄諸生結廬廣勝山中爲九華六逸之一所著有丹崖集九華詩草

青陽縣志

縣志

何煜字寤明青陽人少薄舉子業肆力於詩古文築雙柑園於城東隱居自樂後徧游江湖客死金陵著有青浦集雙柑園集

青陽縣志

劉城字伯宗貴池歲貢善詩古文辭應社初起眾共推之讓之吳應箕平生好談經濟著邊塞屯鹽河渠市馬諸議以史可法等薦至京投知州請假歸北都陷慟哭不欲生南京倉卒立君

馳書可法陳十策又陳四鎮防河之害可法以書幣徵不赴應箕死冒險收其屍葬之巖棲谷隱以終其身著有嶧桐集二十

卷

江南通志
貴池縣志

江杏字君培建德歲貢博涉文史深於天文兵法揣事多中明亡晦跡不出同里鄭三俊爲作傳

江南通志

金學重字任夫建德人與懷甯劉若宰齊名若宰廷試第一人及第而學重困頓諸生崇禎甲申例應貢避不就棲隱深山以

著書終老

江南通志
池州府志

吳鍾字空之青陽人少孤嗜學有文名明亡卜築於朱劉放舊隱處著書以卒同時孔尙大建德人棄諸生隱居以詩畫自娛

池州府志
建德縣志

曹大錫字九章貴池人明季授同知不赴其弟大銓殉難於章

江與弟大隴函其首歸隱遯以終

貴池縣志

桂天斗字凜北貴池人崇禎末考選主簿南都立君上疏陳六

事授縣丞以言不用棄之歸隱所著有子垣日記十卷

貴池縣志

楊培字植生貴池人明亡時年十四卽棄舉子業侍親喪葬畢

徧遊名山著有鹿莊集遊草自鳴草諸書

貴池縣志

畢汝懋字惟修石埭人鏘之冢孫也授光祿署正不就母陳氏

年百歲旣歿猶慟哭幾絕廬墓三年明亡自投於水漁人拯之

遂免爲僧築室陵陽山下不入城市

石埭縣志

柯青字青蓮貴池人明亡棄諸生芒鞋布袍徜徉山水同邑高

映斗以諸生參其師吳應箕軍事應箕死晦跡泉石閒著有梅

溪逸叟集又吳應奎應箕族弟應社合爲復社時有延陵七子

之目奎其一也應箕死貿易村店中與屠沽混處以自晦

南湖通民

傳

姜大器字不盈貴池人明亡棄諸生徜徉詩酒自作北園拙夫解同邑章正之字不求少游太學積分注官明亡棄去築室太樸山陬隱居終老

貴池縣志

江允鶚字叔峙青陽人明亡棄諸生隱於童橋野肆屠沽自污著有有我集二卷

青陽縣志

鮑文標貴池人僑居湓口左兵南下被執誘爲嚮導不從幾死既而南都覆佯狂浪遊嘗在金陵雜民夫入舊內刈草與白頭宮監詳問遺事感慨成詩讀者悲之

南湖逸民傳

鮑光義貴池人工詩文明季避兵棄諸生棲隱七松里所輯有

周易講義

江南通志

國朝蘇有乾字清宇石埭人宋建炎時有繼芳者穎濱四世孫出

宰銅陵遂家太平遷石埭有乾其裔也事親孝與人和不求仕進後以子汝霖貴屢膺

詔贈而被服儒素不肯一就賓筵有德而隱者也

池州府志

舒讓字禮源貴池人篤行好學嘗言讀書求有用爲善貴無名

鍵戶吟誦不慕榮利

池州府志

桂定淮字泗先貴池人少工舉業通經史不肯應試後有產爲

人所佔人勸其訟之官謝曰吾不入城市三十年矣竟不校

南
逸民
傳

胡祈字以甘貴池人經史百家過目成誦不肯應試所居庭院

皆藝菊著有菊軒詩草

貴池縣志
以上舊志

太平府

唐周惟長當塗人居橫山李白嘗贈以詩有曰周子橫山隱開

門臨城隅又曰抱石恥獻玉沈泉笑採珠可穆然想見其人太

白集 當
塗縣志

王翀霄繁昌人雅志林壑不樂仕進貞元閒築室馬仁山講學
從遊甚眾後徙龍首峯西旁有洗硯池時有李暈者稱白之後
裔與王翀霄陳商講究性理亦築室馬仁山高尙不仕

昌縣志

江南通志

王居巖當塗人曾官驍騎衛長史棄官居青山楊行密據淮南
使人以兵迫起之居巖散遣家人以一身歸行密一日行密大
會失居巖急使人至其廬則虛矣

一統志
國春秋本傳

宋韋許字深道蕪湖人志尙冲潔讀書通大義不事科舉築室
榜曰獨樂蘇軾黃庭堅皆與游元符中軾等貶逐雖親密不相
聞許獨承接款曲且周其急士大夫多之高宗欲命以官許拜

命而不署銜自號蕪陰居士

一統志

方汝疆字南夫繁昌人紹興庚辰進士不樂仕進放懷詩酒游

學於江湖間

太平府志

魚潛字德昭當塗人工詩有名隱居不出養鵝鴨以自給

江南通志

元黃禮字文敏蕪湖人以舉人爲書院山長明初徵授龍游縣

主簿以疾歸著有邇言集十卷

太平府志

蔣子成當塗人徜徉溪谷採藥吟詩以逸民終

江南通志

朱文正字敏中蕪湖人嘗爲河口鎮巡檢有政聲洪武初築室

荆山署其居曰懷玉登峯鼓楫淮意所適

太平府志

明祖雋字遠志當塗人永樂中徵修大典當得官辭歸放懷詩

酒翛然自適著有丹湖集

江南通志

戴綬字民信當塗人有孝行工古文以薦授和州學正辭不就

葺采石書院授徒以終

江南通志

王繼字道承蕪湖人殫力明經廬邑南孤山隱居不出慕康節

爲人亦名其詩曰擊壤集

江南舊志

陶于樂字和鳴號霞冠道人蕪湖人隱居東臯不求聞達簪冠

鳩杖瀟灑出塵年九十餘卒

江南舊志

葛天裔字仍民蕪湖人髫齡通經史謝絕進取居山林著書學

道明亡自趨入江有魚舟救之遯跡廬山而卒

太平府志蕪湖縣志

方一貫字魯民繁昌人少爲諸生與徐士毅稱二俊後卜居馬

仁山棄衣巾四十年不入城市戒子孫務農毋庸以讀書干進

年百歲卒

太平府志

方名台字三階繁昌人天啟時副榜明亡隱居於磻山杜門謝

客精研易理著述甚多尤工墨妙號一峯山人

太平府志

郝一楷字心型繁昌人天啟丁卯舉人父歿哀毀放廢絕意進

取後遂閉門隱跡道巾野服與童豎樵牧狎遊於山水間

太平府志

沈士尊字天士蕪湖人士柱弟也復社起士尊以名家子與江

西章羅諸公頡頏士柱死遂誅茅河上委跡巖阿未幾卒

太平府志

吳昌祚字又文當塗選貢郡遭兵燹妻以烈死身亦被創幾殆

遂棄舉業斗室容膝閉戶高吟不與世事

太平府志

吳時舉字熙伯當塗人博學工文嘗遊學白鹿洞有年歸從焦

竑等倡明濂洛之傳高志潔身不干仕進著有掃花尋徑等集

其餘訓三百餘言施閨章笄重光稱其語語真詮如馬援柳玭

之訓

太平府志

郭登名字仲庸當塗人明末謁選得兵馬司指揮卽謝歸放懷

高尚築別業建小樓一編一壺觴咏終日八十餘卒

太平府志

王運泰字開儒當塗人善詩古文詞兼工行楷充歲貢舉以讓
人野服徜徉曳杖山水閒蕭然自得

太平府志

國朝戚嘉縉字公佩蕪湖人先世多不事於名至嘉縉尤操致高
曠但以琴尊自娛聚法書名畫爲珍玩事母至孝人無閒言所
著有竹樾集

太平府志

陶維熊字太占蕪湖人淡泊養素篤志淹雅草舍三五環以短
籬顏其齋曰容膝同邑奚自字公石淹貫經史淡於名利儲書
萬卷抱膝長吟所著有柳村集兄藩亦高雅能詩

太平府志

胡潛繁昌人嗜學有志節不事榮利而性好締交大江南北裘
屨相訪後遊宜興愛其山水遂家焉儲同人欣爲之立傳

太平府志

徐之程字伴樵繁昌人隱居峨鎮放浪詩酒閒著有柳溪草堂
詩集

太平府志
以上舊志

薛宗坤當塗庠生博通諸經尤邃於易居北鄉丁村非應試不

入城里人稱爲孝子其孝行事逸無考

當塗縣志
以下新修

金玠字鐵蕉當塗人耿介工書畫知名一時屢卻當道徵聘讀

書橫望山以布衣終

當塗縣志

廬州府

唐穆潭漁者當楊行密爲廬州八營都巡警憩於江岸漁者鼓

舟直前餽魚數頭曰此猶公子孫鱗次而霸也行密異之遺以

物不顧而去

江淮異人錄

朱葛化龍字雲升合肥人以策論登文科宋亡不仕元行中書

省昂吉以左丞宣慰淮右聞其名屢造門訂交化龍勸以布惠

安民邀之出不應隱居湖右寄跡漁樵子忠性純粹補學職

廬州府志

元葛聞孫字景元合肥人早喪父事母至孝嘗出爲州文學旣而曰此非養志之道遂歸力耕養母結環翠山房以延來學執政薦其學行召爲翰林辭不赴及卒余闕表其墓

一統志

吳志淳字主一無爲人工草隸優於文學元末以蔭歷靖安都昌二縣主簿元亡遂不仕有我已誅茅成小隱欲尋支遯到烟蘿之句

一統志

朱可與舒城人好學博覽尤通尙書慕古高士風不求仕進隱居教授著聞當時

一統志

明方自勉字聖修合肥人性嚴毅不苟然諾里人比之王彥方隱居湖濱以古學教授

江南通志

李澹然字公永合肥人棄舉業喜讀莊騷楞嚴創一亭吟嘯其中顏之曰楓亭故魏伯陽煉丹處也所著有曠園集隱居集黃

葉菴詩

廬州府志

宛杲字彥昭廬江人讀書通世務尤好施予高蹈山林不樂仕

進行誼爲眾所推

江南通志

楊首春字元之舒城人編茅成屋匿影空山每與人講論聽者

忘倦有司往物色之已挂瓢逝

江南通志

濮師堯字懷唐舒城人布衣徒步淡然自足性仁厚博濟活人

甚多子中玉成進士居官有稱

廬州府志

楊大濂字潔甫無爲人高雅恬退耿定向疏薦之不就衣敝履

穿灑然自適著有詠史詩

江南通志

徐少遊字勉之無爲人放情泉石構瀾溪草堂吟詠其中不入

城市自號放牛山人著飯牛集

廬州府志

鍾濟字海源無爲人守義端嚴平生未嘗一接長吏舍後築一

園臨江面山以詩酒終身同邑張綸字淮浦著有林泉隨筆亦

隱君子也

江南通志
廬州府志

李懋修合肥人崇禎初歲貢凡邑中公事有未協者遇事敢言

曾歷眞陽教諭明亡隱於北皋

廬州府志

朱岳無爲人博通經史長吟咏而意不可一世嘗舉懷才抱德

不就自號隱求子同州張轍字良濟絕意科名厭居城市卜築

陽山顏之曰孤臺有孤臺小稿又季友賢者郡庠生淹貫經史

兼精六壬嘗佐史可法幕後歸隱於黃山

廬州府志

丁最字文選無爲人善吟咏不樂仕進所著有槃澗集同州董

全字子異亦隱居不仕與丁最爲莫逆交

廬州府志

劉廷展字孟長無爲人崇禎壬午舉人明亡築室東皋種花蒔

竹有薦之者堅以疾辭同州林若俊字振夫鼎革後棄諸生隱

居東野不入城市

廬州府志

吳爾康字义人無爲歲貢慟父歎以罵賊死遂棄去隱居城南
萇溪所著有萇溪集同州劉從周字憲明天啟時感憤逆璫專
橫不入場屋明亡棄諸生晦跡益深野服終老又錢若愚者字
智叟早歲補諸生明亡棄去徜徉山水著有埜墅吟

廬州府志

陸品字居一無爲人少豪俊肄業南雍性好客過從皆佳士清
談竟日繼以詩酒後乃屏居手自藝植著有放言集同州朱智
字子固明亡棄舉業放情邱壑與品及吳爾康唱和著有北樵
集

廬州府志

國朝郭尙友字千人舒城人少業儒屢試不遇乃棄去移居合肥
之星月城讀書飲酒躬耕自給暇則種花栽竹散步行吟自號

野樵子

廬州府志

蔡梅字鶴招無爲人家貧好學不求仕進所著有風滿樓草及
嶧山桐諸集同州呂貞字正也補諸生旋棄去所著有所思集
又有郭維清者字雲九絕意進取嗜學工詩至老不倦所居桑
者軒竹樹四圍望而知爲高人宅焉

廬州府志

楊林字綺南合肥庠生過目成誦而不喜舉業閉戶著書不履
城市著有臥雲集萬松樓集

廬州府志

曹大復字賓魯巢縣人明諸生端行好學年七十慨然去鄉邑
或遇之白石山禪林中不交一言而去計其壽已百三歲矣後
竟不知所之

一統志
以上舊志

王世珍合肥人精易數嘗絕糧有餽酒食者未至輒先知之苟
非其人忍饑不受也道光辛丑廣東疆臣檄赴軍中不就曰野
人將就木矣越數月無疾而卒

合肥縣志
新修

鳳陽府

漢桓嚴東觀記作礪

字文林沛郡龍亢人鸞之子也幼有志介姑為

楊賜夫人鸞卒姑赴弔整飾從者而入嚴心非之及姑勞問終

無所言號哭而已賜遣吏奉祠因縣發取祠具拒不受後至京

師未嘗舍宿楊氏舉孝廉有道方正茂才三公並辟皆不應初

平中天下亂避地會稽遂浮海客交趾越人化其節至閭里不

爭訟後漢書桓榮傳

晉劉伶字伯倫沛國人澹默少言不妄交遊嘗乘鹿車攜一壺

酒使人荷鍤隨之曰死便埋我雖陶兀昏放而機應不差裴松之三

國志注

元王宗岳字良佐臨淮人性厭俗學講求性道人勸之仕輒不

應學者稱為養高先生江南通志

楊省字治卿定遠人不樂仕進以書史自娛嘗遊三峯青韭諸

山遇佳處輒爲題咏

江南通志

明盛世鳴字太古鳳陽人倣儻有蘊藉嗜古文奇字嘗寓泗州

隱於卜無錫孫少宰繼高聞其詩薦之葉相國向高公卿皆愛

而客之世鳴意不擇退而隱居所著有空谷居士集

江南通志

陳廷玉臨淮人性恬淡博學能詩文動循禮度隱居濠濱有司

累薦不出

江南通志

許鵬字廷舉定遠人少負氣節以賢良方正薦至京師陳時務

語多過直乃於策尾作詩自陳己志不願入選歸隱城南種竹

萬竿因號竹莊以耕讀自娛著有竹莊集

江南通志

姚匡字舜用定遠人性敏過目成誦家貧授徒不慕榮利大學

士謝遷與其父有舊使人召之匡固辭不起

江南通志

趙萃一字魁北壽州人養親至孝資敏而好學隱居山中講明

易理終身不出

江南通志

孫光啟靈璧人崇禎末以歲貢任興化教諭

大兵南下入興化光啟投泮水與夫救之掖以見帥欲官之不受

乃放歸隱居不入城市年九十猶訓蒙餬口縣欲請爲鄉賓亦

不肯就

江南通志靈璧縣志

馬孫鳴靈璧人少穎悟過目成誦明亡無意進取棄諸生聚徒

講學所著有中說星考同邑劉峙曾爲建平訓導其學與孫鳴

同稱

靈璧縣志

方震鼎字調之壽州人震孺之從弟也震孺遭誣被逮鼎變產

調護明亡託跡空門隱於金陵震孺之弟震仲曾以貢官縣州

知州震孺得釋同里崇禎八年流賊躋正陽關震仲出資借震

孺守禦其族人方大耀方之珍姻黨李百順等各出糧餉助軍

壽州得全眾之力也震孺卒震仲亦不復仕

劉鍾英守城紀事鳳臺縣志

方維馨字蘊羞震孺之子也州廩生工詩賦以保舉授瑞金縣

知縣未赴任隨父之任廣西震孺以憂憤卒攜其幼子蹈海以

終

鳳臺縣志

王國光字仲觀懷遠人沈潛理學魏璫流毒折辱士林遂棄舉

子業構屋渦濱顏曰片舫隱居不出

懷遠縣志

常廷齡懷遠人開平王遇春裔孫南京錦衣衛世指揮使襲封

懷遠侯崇禎十六年全楚淪陷請統京兵赴九江協守帝嘉之

不果行明亡不出身自灌園蕭然布衣終老

明史常遇春傳

唐亮字寅工懷遠人與其鄉人秦偉人沈健翮皆以詩鳴性癖

嗜酒慷慨悲歌往往有麥秀黍離之感有芥子堂詩鈔一卷

懷遠

縣志

李引年壽州庠生明末當貢不就鍵戶著書每朔望集其鄉人

以先聖哲言勸化人推敬之

鳳陽縣志

國朝張翀字健翮鳳陽人絕意進取茅屋數椽書一架外別無長物惟耽花竹號所居曰竹鵑閉戶讀書士大夫欲一見不可得

所著有竹鵑集增訂禽譜菜譜數種年至八十餘卒

鳳陽縣志

周廷棟字豫章宿州人博學多聞性理子史諸書無不精研工

詞賦書宗二王隱居不仕

江南通志以上舊志

潁州府

晉戴逵字安道譙國人少博學好談論善屬文能鼓琴太宰武陵王晞聞其善鼓琴召之逵對使者破琴曰戴安道不爲王門伶人後徙居會稽剡縣常以禮度自處深以放達爲非乃著論

以明之孝武帝時累徵不就王珣爲尚書復上疏請徵亦不至

長子勃有父風義熙初徵之不起

晉書本傳

宋戴仲若達之次子也與兄勃遊於桐廬勃卒徙居吳下吳人

其爲築室聚石引水植林開澗有若自然乃述莊周大旨著逍

遙論及禮記中庸篇元嘉中徵之不就後張邵迎之至京口黃

鵠山有竹林精舍林澗甚美文帝每欲見之謂黃門侍郎張敷

曰吾東巡之日當宴戴公山下也

南史本傳

唐張彪穎上人遭亂奉老母避地隱居嵩山時與杜甫往還杜

有寄張十二山人云靜者心多妙先生藝絕倫觀此可以知其

人矣

唐才子傳

明李鶴霍邱人制行端方闡明聖賢之道隱居教授一時秀彥

多出其門

潁州府志

徐揆方字惟適潁州人讀書能強記人於古事有忘者質之卽指曰在某書某冊某頁檢之信然郡縣官吏有來訪者輒踰垣

遞去

潁州府志

顧爾言字信父亳州人博學善文以貢入都廷試一等告歸絕意仕進嘗曰人苦不知足吾有田給養殮有室蔽風雨彈琴種

竹課子讀書此外復何求耶

潁州府志

周貞霍邱人恬淡無求放跡山水嘗曰人生貴適志耳苟凝滯於物圭組山林隨在皆桎梏也同邑王冕亦不慕榮利持己接物皆以古道自處又有庠生周允恭及田九賦者皆不求榮利有託而逃又吳士升太和人皓首窮經泌如故人以夷惠目之

江南舊志
潁州府志

周允升字四方霍邱選貢明末寇亂邑人驚竄獨坐茅屋中揮

絃晏如一寇聞琴聲免胄入謁允升略不經意寇趨出戒其下

曰此高士盧慎勿犯以箭識其門而去

府志

徐履方字孟簡潁州人屏絕人事布衣草履挾書一卷酒一餅

坐臥茂林修竹閒看花聽鳥自樂而已卒年八十餘

府志

王清臣潁州人明季有張光度者買田潁南一日出游見耕而

歌者聽之皆杜詩也遂就問姓名言向有田不耐徭役盡委之

族爲人傭耕過其廬見舊時憲書背皆以煤書自作詩記其述

懷一章云人生如泛梗飄飄殊無根飲啄得幾許營營晨與昏

對此春日好荷鋤出南原近觀草色敷靜聽鳥語繁有身貴適

志窮達安足論亂後不知所終

江南通志

張思濬字孟深潁州人以祖父鶴鳴平奢曾功廕錦衣千戶署

南都本衛鎮撫事明亡隱居不仕有薦之者堅辭不應

府志

國朝李國章字公憲蒙城人以貢授太湖訓導不赴埽榻吟咏脩

然若出世外

穎州府志

高淩漢霍邱人篤學重道隱居授徒尤了徹性命之理一夕盥

沐更衣坦然而逝

潁州府志以上舊志

滁州

朱雍存全椒人隱居求志以文史自娛號南郭先生以縣有獨

山又號獨山翁州守錢公輔曾肇皆與之遊

江南通志

元范思敬全椒人有志操能文章至正初嘗獻治平十二策不

報遂歸隱石子岡之梁莊號棲谷子

江南通志

明游炯滁州人通經博覽不求仕進性淳樸有古人風後進多

執經問業者

滁州志

吳湘字江筠全椒人工詩文書畫不求仕進嘗輯集許而下若

千人爲尙友編

江南舊志

吳良桂字汝芳全椒人少補諸生旣而棄去嘗輯古之嘉言懿行可備省覽者爲一編題曰北窗逸史家徒壁立處之晏如邑令式其廬題額贈之曰淮南眞隱

江南舊志

駱俊滁州人平居耽味經史不求聞達行義修潔人皆重之著有靜中自樂詩集

江南舊志

周廷珮字國珍來安人例當謁選不就耽情田園種菜植果以自娛性好施予急人之急邑有義舉無不首倡分其產於姪與

子均卒年八十三

滁州志以上舊志

和州

宋何宗英和州人紹興閒以布衣上書言敵必渝盟宜先事爲

備請幸建康以張國勢不報遂隱居以終士論高之

萬姓統譜

張同之字野夫和州人以進士為部使者至舒州游浮山悅之
遂棄官棲隱得修煉術今張公巖遺蹟猶存安慶府志舊志
安慶府流寓新

張祁歷陽人子孝祥廷對第一祁晚年卜居蕪湖昇仙橋西築
堂曰歸去來觴詠自適所居池多蛙即以硯擲之蛙聲遂息至

今名其池曰禁蛙一統志舊志太
平府流寓新移

王德良字秉彝和州人鉤經索史智識過人間徜徉山水見巖
姿川容細繲獻狀情思熒熒然曰精聚神會吾殆與之無間豈
古人所謂烟霞痼疾也耶勸之仕笑不答僑居金華建藥區市
中蓄善藥以賑人急甚重者不受其直由是樂善之稱聞四方
秉彝曰是善名我遂以榜其堂宋陳王秉彝傳
浙江通志新増
元潘子安和州人工詞遨遊海內流寓於楚之沔陽有海天清

嘯集行世

和州志引
潯陽志

明杜浩字守彝和州人洪武初居南葵村力學篤行安貧不仕

江南
通志

楊先字古野和州人少補諸生卽棄去隨伯父瑞之任武城武
城多金石遺文遂殫精字學以書名後又隨任建甯爲朱子闕
里乃盡棄俗學耽心性理性本孤僻達官貴人乞其書輒掉臂
去生二子教之力田讀書終身不許入公府餽粥不繼吟嘯自

如

和州
志

張應元字仁甫和州人嘗從焦竑等遊微言名理深入其室後
棄諸生號裕溪漁隱所著作譜志詩文輯錄數十卷

江南舊
通志

陳善字孟嘗和州人事親以孝聞母罹寇難哀毀不欲生時將

貢棄去隱居以終

和州
志

唐名鴻字情符含山人明亡棄諸生隱蒼山有欲援之者柬之以詩曰逢人莫說興亡事召我難回鐵石心平生最愛蒼山好

今日蒼山深更深

含山縣志

成其德字君實和州人性至孝讀書不干仕進但以承顏養志爲務柏鄉魏冢宰裔介爲立傳

和州志

魯懋聲字有夫和州人寇難被創合家殉難遂棄諸生絕意進取惟以經史自娛

和州志

張宏開字文伯和州人元槓子也弱冠有文名與楊維斗等交善元槓殉難伏闕上書請謚士論嘉之南都覆棄諸生隱居白洋宣城施愚山爲序其事

和州志以上舊志

廣德州

宋張介廣德人紹興中隱居城北不干榮進郡守張諤慕其名

訪以政要嘗欲疏其學行薦於朝固辭不就

江南通志

趙平叔廣德人咸淳中隱居城西琴山側樂松竹泉石之勝構

一樓以縱眺吟咏自適題曰萬山樓

江南通志

元湯志真廣德人隱居求志行式鄉閭明錢用壬出其門其學

皆志真所造就也

廣德州志

盧志賢廣德人至元中隱居不出清修高節一時稱重

江南通志

明甯時字際之廣德人受業於宣城沈壽民沈稱之曰甯子博

其學無所不畜抑其才一求諸道隱居義蒼山中著有尙書洪

範解論語口授講義屈辭疏指諸書

廣德州志

張榜字子賢廣德人性孝友親喪廬墓處家尺帛不自私隱居

青石山吟咏終老

廣德州志

呂仲修字祖生建平諸生崇禎庚辰廷試特賜進士授樂安知

縣道梗不能赴遂歸隱居不仕

廣德州志

國朝戈琮字耦蒼廣德人澹於進取足跡不入城市人敬憚之著

有見山樓詩集

廣德州志以上舊志

六安州

晉何準字幼道廬江濡人高尙寡欲弱冠知名州府交辟並不

就兄充爲驃騎將軍勸其仕準曰第五之名何減驃騎準兄弟

中第五故有此言充居宰輔而準散帶衡門不及人事徵拜散

騎郎不起

晉書本傳

杜夷廬江濡人懷帝時刺史王敦舉爲方正偁赴洛夷遜於壽

陽鎮東將軍周馥傾心禮接自詣夷爲起屋宇馥敗夷歸舊第

一統志舊志鳳

陽府流寓新移

宋何求字子有偃弟鑠之子也元嘉末歷太子洗馬丹陽郡丞

清退無嗜慾後爲太子中舍人泰始中除中書郎不拜又除永

嘉太守一夜忽乘小船逃歸吳隱武邱山齊永明四年拜大中

大夫不就

南史何尙之傳

何點字子皙求之弟也年十一居父母憂幾至滅性求卒點菜

食不飲酒三年宋太始末徵爲太子洗馬齊初累徵中書侍郎

太子中庶子並不就豫章王嶷命駕造點點從後門遯去梁武

帝與點有舊既卽位徵爲侍中點將帝鬚曰乃欲臣老子不起

初褚淵王儉自宋入齊爲宰相點謂人曰我作齊書已竟贊云

淵既世族儉亦國華不賴舅氏逼恤國家王儉聞之欲候點知

不可乃止

南史何尙之傳

齊何子季點之弟也年八歲居憂毀若成人師事劉瓛受易及

禮記毛詩仕齊爲建安太守政有恩信人不忍欺每伏臘放囚

還家依期而返歷位至中書令拜表解職居若邪山雲門寺初
二兄求點並棲遯求先卒至是子季又隱世號點爲大山子季
爲小山謂之何氏三高永元中徵爲太常太子詹事並不就梁
武帝卽位詔徵爲特進光祿大夫不起有敕給白衣尙書祿不
受卒年八十六著書甚富子撰亦不仕有高風南史何尙之傳

明康持字敬夫六安人自幼嗜學不求仕進

六安州志

張崇能英山人性孝友工吟咏隱居清溪不求榮利同州蔣宗
成化中貢生授蘄州判不樂仕進歸隱講學以終其身

江南舊志

六安州志

熊應隆字道隆霍山貢生通五經三史新安許國極推重之不
求仕進隱居南山以著述爲事卒年八十著有四書五經南華
經陰符經解

六安州志

朱一莊字克疆六安歲貢博通經史潛心理學隱居不仕歐陽
德爲作樂道堂記同州何璐字良玉清介不苟亦以歲貢樂道
不仕

六安州志

楊行達字達可六安人崇禎中選貢明亡謝絕人事隱居著書
弟行孚亦應貢不就簪冠芒鞋行吟自適

六安州志

段一定英山人性孝友當喪亂後族中子女流離失所者皆出
資爲安輯之閉戶教授不與世事三十年如一日

江南通志
六安州志

余有珩字行玉英山貢生通象緯崇禎中知世將亂隱居天化
坪需次當授教職避不就卒年八十

六安州志

吳中望霍山人有聲藝苑後乃結廬天柱之南以揮毫染翰自
娛同邑林宣錢朝選皆博學工詩不求聞達名重一時

六安州志

上舊志

國朝夏日長字龍門六安人博覽羣籍嗜詩酒尤工書書成輒毀去閒有得其完紙者攜至都門大學士劉墉極贊歎數以縑素寄州守屬曰長書竟不一報

六安州志新修

泗州

隋趙徵君泗州人失其名讀書璧山隱居不仕鄉人於遺阯建璧山書院祀之

江南通志

明李公度字思貞泗州人弱冠領鄉薦勸之仕不應部使者以國子博士薦不就

江南通志

張時榮五河人嘉靖閒歲貢例當得教職榮曰吾安能折腰後生輩耶遂不仕閉門著述尤工書法在鍾顏之閒

五河縣志

石應瑞字兆生天長人家貧孝友授經以養父母崇禎己卯中副榜例當仕不就置一廬雲水閒讀書自樂時比之仲長統云

江南
通志

李公孝泗州人以貢授如皋教諭甫數月卽告歸林居樂道年八十五卒人稱樗野先生同州高尙志以舉人知濰縣亦早賦歸清貧自適有五柳之風

泗州志

鄭輔盱眙人隱居城東自食其力又有李木方陳職陳卜趙師賢者皆以隱稱

盱眙縣志

國朝陳歌泰字古彈天長人順治戊子拔貢情退不仕講學修行鄉人皆爲感化

江南通志
以上舊志